


| 目錄 |

第一篇 青春作伴 -----	2
01 人生的路家己行 -----	4
02 做伙大漢，陪你老 -----	9
第二篇 家鄉的歌 -----	15
03 彼年熱天的東部名產 -----	18
04 夢中的坪仔田 -----	24
05 甜穠的氣味 -----	29
第三篇 時間的河 -----	34
06 電子時代 -----	36
07 搬戲囉 -----	41
第四篇 寶島的故事 -----	47
08 快樂農場 -----	50
09 阿公咧蹣院 -----	56
10 山暗光起厝 -----	66




第一篇 - 青春做伴 (臺羅版引言)



Tē-it phinn

Tshing-tshun tsò-phuānn



第一篇 - 青春做伴 (臺羅版引言)

Tshing-tshun sī huann-hí, bīn-tuì tñg-tuā-lâng, ē-tàng kiânn hiòng ka-kī ê sè-kài. Tshing-tshun ê kiann-hiânn, khuah-bóng-bóng ê jîn-hái, sī beh kiânn tuì tó-uī khì? Bián kiann-hiânn, lán ê tshing-tshun bē koo-tuann, ū sī-tuā-lâng kā lán sio-thîn, ū tsîan-puè kā lán ín-tshuā, ū hó-pîng-iú kah lán tsò-tîn, ū thinn-tē bān-bùt kah lán tsò-phuānn. Siánn-mih lóng bián kiann, tsò tsit ê tshing-tshun khuài-lòk ê oo-niau-tsí--á, oo-káu-hiann, bīn-tuì jîn-sing ê lōo ióng-kám hiòng-tsiân kiânn.

Tē-it khò “Jîn-sing ê lōo ka-kī kiânn” Tsít ê tsò lāu-bó ê lâng, khuànn-tiôh gín-á siūnn-beh uānn thâu-lōo, sui-jiân ū tsit-kuá tshau-huân, siōng-bué iáu-sī kuat-tîng pàng-tshiú hōo kiânn kiânn ka-kī jîn-sing ê lōo, tsin sī tsit ê ū tì-huī ê hó a-bú. Lán tàk-ke siūnn khuànn-māi, jîn-sing ê lōo ài án-tsuánn lâi phoo-pâi?


Tē-jī khò “Tsò-hué tuā-hàn, puê lí lāu” Siàu-liân-lâng tuì tshī káu ê kuè-tîng, thé-huē-tiôh lâng kah tōng-bùt ê kám-tsîng, ū thiànn-sioh, ū i-nāi, iā liáu-kái-tiôh sènn-miā tiong senn, lāu , pēnn, sí lóng sī tsìng-siōng ê kuè-tîng. Tû-liáu lâng kah lâng tsikan ū kám-tsîng, lán bīn-tuì bān-bùt, tiôh-ài án-tsuánn lâi sio thiànn-thàng?

01- 人生的路家己行 (臺羅版課文)




Jîn-sing ê lōo ka-kî kiânn

Tshuà Sòo-tsú



Hōng Hui-hui tshiùnn ê 〈 Sim-kuann pó-puè 〉：
"Khuànn lí tōo-tsè, khuànn lí siu-nuā, khuànn lí teh
óh kiânn"、"bāng lí tsing-kong, bāng lí tsâi-tsîng,
bāng lí kuánn-kín tuā", tshiùnn-tshut thian-hā pē-bú
sim. "Pē-bú thiànn kiánn sī tñg lâu-tsuí", kiánn-jî
sī-sè sī pē-bú tsit-sì-lâng ê kuà-gâi. M-koh tû-liáu
kuan-sim, tsiok-hok, bô-huat-tōo siánn-mih sî-tsün
lóng tuè-tsîng-tuè-āu, tsóng--sī, jîn-sing ê lōo ài ka-
kî kiânn. "Tshiú phō hâi-jî, tsiah tsai pē-bú sî", gín-
á siánn-mih sî-tsün tsiah ē-tàng thé-huē pē-bú ê sim-
tsîng --leh? Khó-lîng ài tán-kàu ka-kî tsò-lâng ê sî-
tuā--looh!


Pún phinn sī jip-suán 106 nî tsuân-kok gí-bûn
kîng-sài lóng-thòk kàu-su-tsoo ê bûn-tsiong, tsok-tsiá
Tshuà Sòo-tsu sió-tsiá, sī Thô-hñg-tshî Liông-an kok-
sió ê lâu-su, bat tî tsuân-kok gí-bûn kîng-sài Bân-
lâm-gí ián-suat, lóng-thòk, jî-im-jî-hîng-tsoo lóng
tiöh-tsióng. I kóng iu-bí ê Bân-lâm-gí bûn-huà ū
tsóo-sian ê tì-huî, su-iàu tsit tâi thuân tsit tâi, hák-
hâu ê pún-thóo-gí-bûn kàu-iòk ē-tàng pó-liû gí-giân
ê sènn-miā, gí-giân liû-thuân--löh-khì, bûn-huà tsiah
ū iân-siòk. Ng-bāng muí tsit ê lâng lóng kâ Bân-
lâm-gí óh hōo hó, hōo iu-bí ê Bân-lâm-gí bûn-huà
ē-tàng íng-uán liû-thuân--löh-khì.



01- 人生的路家己行 (臺羅版課文)

Khuànn-tiōh guán hāu-senn hiah hó ê thâu-lōo m̄ tsò,
 suah beh tsáu-khì Tâi-pak hit-ê tuā too-tshī bē siánn-mih
 tsìn-kháu ê bih-luh, thâu-khí-sing guá sī tsin bô tsàn-sîng. I
 ū kā guá tsun-tshûn, it-tít kā guá kóng, bôk-tsiân tsit ê
 thâu-lōo sui-jiân lī lán tau khah kīn, koh tiānn-tiānn tsiap-
 tshiok guā-kok-lâng, m̄-koh i tuì tāng-ki-hāi bô hìng-tshù, i
 ê tōng-ōh beh kài-siāu i khì Tâi-pak bē tsìn-kháu ê bēh-á-
 tsiú, i siūnn-beh khì tshì-khuànn-māi--leh!

Guá kā i kóng, lim sio-tsiú m̄-hó, lán tau lóng bô
 lâng lim sio-tsiú, jî-tshiánn tuì Hüt-ka lâi kóng, lim tsiú sī
 phuà ngóo-kài, lim tsiú ê gōo tāi-sū, tshut tshia-hō. Lán
 keh-piah hit ê tsiú-khong--ê, lim tsiú lim kah tshân-hñg bē-
 liáu-liáu, in bóo mā tuè-lâng-tsáu. Lán ka-kī to bô ài lim--
 ah, ná thang khì bē tsiú lâi hāi pát-lâng--leh? Tse sī guá
 thiann-tiōh i beh khì bē sio-tsiú tsiok siū-khì kā i kóng ê
 uē. M̄-koh huán-tuì bô-hāu, pit-kìng gín-á í-king tuā-hàn--
 ah, lâng kóng "Ē-senn-tit kiánn sin, bē-senn-tit kiánn sim."
 Ták-pái i kuat-tīng ê tāi-tsì, lóng sī tsin kian-tshī beh khì
 tsò.




01- 人生的路家己行 (臺羅版課文)

Sui-jiān guán sī tsng-kha-lâng, m̄-koh sóo-ū khuànn-kuè i ê lâng lóng kóng i í-king tsiānn-tsò sī too-tshī-lâng.
In-uī i ê tshīng-tshah kah sing-uāh hong-sik, kah guán tsha tsiok tsē, kan-na khuànn sann-á-tû kah hit jī、sann-tsáp siang ê-á, lāu-pē ták-pái khuànn-khuànn--leh lóng sī hàinn-thâu.

Koo-put-jī-tsiong, tsuè-āu guá mā sī tiām-tiām-á tsiok-hok--i. Guá khuànn i uī-tiōh beh khì hit king kong-si siōng-pan, khai-sí khì siōng-khò, jīn-tsin leh thák siong-kuan ê Ing-bûn-tskeh, kánn-ná ū leh hak-sip--ooh! Nñg kò guéh āu tsiah tsìng-sik hōo lâng lòk-tshú, tsit-má piān-ná khuànn-tiōh i tñg--lâi, guá tō kín kā i mñg: "tsò-liáu án-tsuánn?" Liân-suà nñg pái i lóng kā guá kóng: "Tsiānn hó."

Guá sim-lâi iáu-sī tsiānn giâu-gî, m̄-koh guá ū kā kau-tài, tshut-mñg tsāi guā ài tsù-ì, pháinn-tāi m̄-thang tsò, tòk-phín m̄-thang bak, puáh-kiáu m̄-thang óh, lim sio-tsiú m̄-thang kuè-liōng, siōng tiōng-iàu ê, lim tsiú bē-sái koh sái-



01- 人生的路家己行 (臺羅版課文)

tshia. Guá siūnn i í-king tuā-hàn--ah, tsin tsē tāi-tsì ka-kī
ài tsai hun-tshùn.

Thian-hā pē-bú-sim, guá bō ñg-bāng gín-á tsò guā tuā
ê sū-giáp, ū guā tuā ê sîng-tsiū, kan-na ài i pîng-pîng-an-
an, kha-tâh-sít-tē, kui-kui-kí-kí lâi tsò-lâng, ē-hiáu an-pâi
ka-kī ê jîn-sing tō hó. Pit-kìng i ê sî-tāi kah guá siàu-liân
sî-tsūn ê khuân-kíng í-king bô kāng, i tsit-má ê ap-liik it-
tîng pí guá í-tsîng koh-khah tuā, guá hi-bāng i ē-tàng ke
óh tsit-kuá mih-kiānn lâi tsing-ka ka-kī ê lîng-liik.


Kāng-khuán hit kù uē, "Jî-sun tsū iú jî-sun hok", guá
kan-na ē-tàng tî áu-piah tiām-tiām kā tsiok-hok, ñg-bāng i
ē-tàng sū-sū-hāng-hāng lóng sūn-sī, tse tō sī guá siōng tuā
ê an-uì.

02- 做伙大漢，陪你老 (臺羅版課文)



Tsò-hué tuā-hàn, puê lí lāu

Tēnn Iōk-pîn




02- 做伙大漢，陪你老（臺羅版踏話頭）

Senn-lāu-pēnn-sí sī lāng lóng ē king-lík ê kuè-tîng, tōng-bùt mā sī kāng-khuán, sīm-tsì tōng-bùt piàn lāu ê sok-tōo pí lāng koh-khah kín. Tsin tsē lāng lóng ū tshī thióng-bùt ê king-giām, thióng-bùt hōo lán tsin tsē un-luán hām tshù-bī, tán-kàu in tsīam-tsīam piàn lāu ê sī-tsūn, lán ài iōng siánn-mih sim-thài khì bīn-tuì? Iōng siánn-mih hong-sik tsīau-kòo in tsiah tiōh--leh?


Tsit phinn bûn-tsiong siá-tshut tsok-tsiá huat-hiān tsū sè-hàn puê-phuānn i ê káu "Tshài-thâu"í-king bô í-tsá hiah-nī uáh-kut, king-kuè a-pah ê thê-tshénn, thé-jīn-tiōh "Tshài-thâu"í-king piàn lāu ê sū-sít, sóo-í i khai-sí su-khó ìng-kai ài án-tsuánn kè-siök puê-phuānn "Tshài-thâu".

Tsok-tsiá Tēnn Iòk-pîn lāu-su sī A-tsiu tāi-hák Thong-sik-tiong-sim ê tsōo-lí-kàu-siū, tshòng-tsok ê bûn-thé to-guân, tshiūnn sin-si, tap-tshuì-kóo, suànn-bûn tíng. I ê tsok-phín bat tiōh-kuè tsin tsē pái "Lâm-tâu Giòk-san bûn-hák-tsióng"suànn-bûn, pò-tō bûn-hák iu-suán, mā jíp-suán Kàu-iòk-pōo bú-gí lóng-thòk-kó ting-bûn tsin tsē pái. I iā bat tsham-ka tsuân-kok gí-bûn kīng-sài Tân-tiong-tshī hók-sài Kok-gí, Bân-lâm-gí ián-suáat, lóng-thòk pí-sài, lóng thêh-tiōh tsin hó ê sîng-tsik. Tēnn Iòk-pîn lāu-su hi-bāng hák-sing ē-tàng thàu-kuè lāu-su ê ín-tshuā,



02- 做伙大漢，陪你老 (臺羅版踏話頭)


jīn-bat Tāi-uân ê lîk-sú hām bûn-huà, thé-huē lán
pún-thóo gí-giân ê suí.



02- 做伙大漢，陪你老 (臺羅版課文)

Thiann a-pah kóng lí lâi gún tau ê sî, tsiah tú tshut-sì tsit kò guéh niā-niā. A-pah khuànn lí hām guá pênn tuā koh tsiok kóo-tsui, tō kā lí phō tñg-lâi tshī. A-má khuànn lí kui-sin-khu ê moo pêh-pêh-pêh, kánn-ná tshin-tshiūnn tsit liáp tshài-thâu, tō kā lí hō-tsò "Tshài-thâu". Tsáp-guā nî kuè--khì, lán nñg ê tsiah hó tshīng hó, tsit jit tsit jit tàu-tin tuā-hàn.

Kiàn-pái guá pàng-ôh tñg--lâi, lí nā thiann-tioh guá ê kha-pōo-siann, tō ē tī mñg lâi-bîn it-tít puī, it-tít puī. Mñg tsit-ē khui, lí ē huann-hí kah thiàu khí-lâi guá ê sin-khu-tíng, kiò guá kuánn-kín kah lí sñg. M-koh tsit-tsām-á, lí ná ē bô tshiūnn khah-tsá hiah-ní-á uáh-kut, mñg nā khui lí kan-na sî liâu-liâu-á kiânn uá--lâi tuì guá puī--tsit-siann, tō koh liâu-liâu-á kiânn tñg-khì lí ê siū hioh-khùn--ah. Guá siūnn lí kám-sî teh kuài guá lóng teh pôo-síp, bô-îng thang tshuā lí tshut-khì tshit-thô--leh? M-koh tsuè-kín tsiah-àm-pá tshuā lí khì hák-hâu tsáu ûn-tōng-tiânn, lí tsiah tsáu tsit lìn tō bô ài tsáu--ah. Guá tî thâu-tsîng tuā-siann huah: "Tshài-




02- 做伙大漢，陪你老 (臺羅版課文)

thâu, kín, kín tsáu--lah!" Lí kan-na kōo kiânn--ê, tē-jī lìn
tō bô siūnn-beh koh kiânn--ah, sít-tsāi tsin hāi!

Tíng kàu tshù guá tsin siū-khì, kā a-pah kóng lí piàn
kah tsiok pîn-tuānn--ê, bòk-kuài jú lâi jú tuā-khoo. A-pah
kā lí mooh khí-khì i ê kha-thuí, mā kiò guá tsē--leh, kā
guá kóng: "Lâng ē lāu, káu mā ē lāu. Lí kám tsai? Tshài-
thâu nā iōng lâng ê huè-sòo lâi sòng, i í-king beh lâk-tsáp
huè--ah--neh!" Siannh? Tshài-thâu, gún tau ê tsit tsiah káu-
á-kiánn piàn a-kong--ah? "Sóo-í, i ê kha-tshiú ē piän khah
bān-tūn mā khah bô tsing-sîn, bô-huat-tōo tshiūnn í-tsá sì-
kè tsōng sì-kè thiàu--ah. Kî-sít, Tshài-thâu mā tsin hi-bāng
ē-tàng put-sî hām lí tsò-hué sñg." Tshài-thâu bē-su thiann-ū
kāng-khuán, giâh-thâu iōng tshinn-kìn-kìn ê bák-tsiu-jîn kā
guá siòng, ná-tshin-tshiūnn teh kā guá huē-sit-lé.


Guá bák-sái kâm bák-kînn, sim-kuann tshin-tshiūnn
tsiam teh ui. Tshài-thâu, guá mā tsai lí ná ē pí guá khah
kín lāu? Guá koh tî-leh hiâm lí pîn-tuānn.



02- 做伙大漢，陪你老（臺羅版課文）

A-pah koh kóng: "Ū-iân tsiah ē-tàng tsò tsit-ke-hué-á, lāng hām tōng-bùt lóng sī ū kám-tsīng--ê. Lán ài kám-siā tshù--lí in-uī ū Tshài-thâu ê puē-phuānn, ke hiah tsē un-luán, hiah tsē tshù-bī. Tsit-má Tshài-thâu lāu--ah, bī-lâi lán tiōh koh-khah tin-sioh ū i puē-phuānn ê sī-kan, phuè-háp i ná lâi ná lāu ê piàn-huà, m̄-thang hōo i siunn thiám!"


Tshài-thâu, guá liāh-tsún lí hām guá kāng-khuán tng-teh tuā, siūnn-kóng lí ē íng-uán kah guá kāng-khuán; liāh-tsún lí iáu-sī tsit tsiah khuài-lòk ê káu-á-kiánn, ná tsai lí ē lāu kah tsiah kín, sim-kuann-lāi tsiok m̄-kam! Tsū kin-á-jít khai-sí, guá it-tīng ē lí-kái lí ê kái-piàn, pá-ak sī-kan puē-phuānn--lí, mā tsin kám-siā lí tsîann-tsò gún tau ê tsit-hūn-tsú, guá ē hó-hó-á puē lí kàu lāu-lāu-lāu.



第二篇 - 家鄉的歌 (臺羅版引言)



Tē-jī phinn
Ka-hiong ê kua




第二篇 - 家鄉的歌 (臺羅版引言)

Lán Tāi-uân sui-jiân bô kài khuah, m̄-koh tàk ê tē-hng lóng ū i ê tik-sik, kah hōo lâng bê-luân, huâi-liām ê sóo-tsāi. Phì-jû kiōng-tōng ê ìn-siōng sī Ke-lâng hōo, Sin-tik hong, iáh-sī A-lí-san, Jít-guát-thâm tíng-tíng. Ah nā tī lán kok-lâng ê thâu-khak-lāi, lí ìn-siōng siōng tshim--ê sī tó tsit hāng? Tsit-má nā tñg-tiòh nî-tseh, tàk-ke mā huann-hí teh khìng-tsiok, bó-tshin-tseh, pa-pa-tseh, sīm-tsì sī sin-lík "hānn kuè-nî ", lóng tsin lāu-jiát. Lán thuân-thóng ê nî-tseh, mā ū tsin tsē hōo lâng siàu-liām ê kì-tî--oooh!

Tē-sann khò "Hit nî juáh-thinn ê tang-pōo bîng-sán" Sī biô-siá tsit ê siàu-liân-hiann tshing-tshun ê kì-tî. Tsham-ka uáh-tāng, suah khì tú-tiòh hong-thai lâi tàu-lāu-jiát, sui-jiân uáh-tāng siū-tiòh íng-hióng, bô-huat-tōo tsiàu guân-pún ê hîng-thîng. M̄-koh iā in-uī án-ne, ē-tàng tshim-tshim kám-siū-tiòh hong-thai ê ui-lík. Hōo lán tsai-iánn hong-thai tsìng-king sī lán Tāi-uân ê tik-sán tsi it.

Tē sì khò "Bāng-tiong ê phiânn-á-tshân" Sī tsit ê a-peh khì-phut-phut teh khòng-gí. Lán Tāi-uân ū hó-suann, ū hó-tsuí, koh ū siōng suí ê jîn-tsîng-bî, lán ná ē ka-kî bê-hiáu him-sióng, bô kā tiōng-sî?



第二篇 - 家鄉的歌 (臺羅版引言)

Kan-na teh khuànn pát-lâng, lóng bô khuànn-kìnn
ka-kī?


Tē-gōo khò "Tinn-kué ê khì-bī" Sī tshin-lâng
tsò-hué ê kì-tî. Sui-jiân siòk-gí-uē kóng: "Sin-lē bô
siat, kū lē bô biát", bīn-tuì hiān-tāi siā-huē jīn-tsīng-
sè-sū piàn-tōng tsîann kín, thuân-thóng ê nî-tseh kah
uáh-tāng, tàu-té koh ū tsûn-tsāi ê pit-iàu--bô? nā sit-
khì tsia-ê kóo-tsá ê kám-tsīng, lán ê kiánn-sun kám
ê m̄ tsai-iánn lán bûn-huà ê kin-té tī tó-uī?

03- 彼年熱天的東部名產 (臺羅版課文)



Hit nî juáh-thinn ê tang-pōo
bîng-sán


Iûnn Ún-giân



03- 彼年熱天的東部名產 (臺羅版踏話頭)


Tang-pōo juāh-thinn ê bîng-sán, lí ē siūnn-tiōh siánn-mih? Hua-lian ê bòk-kue? Tân-tang ê sik-khia? Tsok-tsiá tik-piát suán "hong-thai" tsò tsú-tê, sit-tsái tsin tshù-bī! Hong-thai, tuì Tân-uân-lâng lâi kóng sī iū-koh kî-thāi 、 iū-koh kiann-hiânn ê "tik-sán". Juāh-thinn ē lâi Tân-uân tàu-lâu-jiát, hōo thinn-khì ke tsit-kuá tshing-liâng, tān-sī khah giâm-tiōng--ê mā ē tsō-sîng tuā sún-sit. Tī lâk, tshit-tsáp nî-tāi Kiù-kok-thuân hioh-kuânn, hioh-juāh lóng ē kí-pān iânn-tuī, sī tong-sî siàu-liân-gín-á siōng kî-thāi ê uâh-tāng. Tsit pái sui-jiân tsok-tsiá bē-tàng uân-sîng uâh-tāng, ū tām-pôh-á uî-hām, m̄-koh tse tik-sû ê thé-giām, hōo lâng íng-uán ē kî-tiâu-tiâu.


Pún-bûn sī 107 nî Tsuân-kok gí-bûn kîng-sài Bân-lâm-gí lóng-thòk ko-tiong hak-sing-tsoo bûn-tsiong, tsok-tsiá Iûnn Ún-giân kàu-siū, Tân-tāi Tsu-sìn kang-thîng hak-hē pit-giáp, tann tī Tân-tiong kàu-iók tāi-hak Tân-uân-gí-bûn hak-hē kà-tskeh. Tân-hak sann-nî ê sî (1987 nî) khai-sí tsò Tân-bûn khang-khuè kàu-tann. Bat pian-tsíp Tân-bûn tsáp-tsì, tsiong Huâ-bûn, Ing-bûn sió-suât Tân ik, kiàn-tì Tân-huâ suànn-tíng sû-tián, Tân-gí-bûn gí-sû kiám-sik, Tân-gí-bûn kî-ik tíng hē-thóng thê-kiong tàk-ke lâi tshâ-sûn sú-iōng, tsú-pian 《 Tân-gí-bûn ūn-tōng hóng-tâm kî sú-liâu luî-pian 》(2008 nî , Kok-sú-kuán) , 《 Uât-



03- 彼年熱天的東部名產(臺羅版踏話頭)

iûnn bîn-tsú hoo-siann: Kû-kim-suann Uan-khu Tân-uân-tsi-im tshiú-kó kái-thòk » (2020 nî , Tân-sú-phok) tíng tsheh.






03- 彼年熱天的東部名產 (臺羅版課文)

In-uī tsham-ka tang-hái-huānn kiān-hīng uáh-tāng, tsáp-lák huè hit nî juáh-thinn, guá tsit ê Tâi-pak gín-á, thâu tsit pái ka-kī tsē hué-tshia khì Hua-lian. Ē-tàng pò--tiōh, pí tiōh tuā-tsióng koh-khah huann-hí, sui-jiān guá mā m̄ bat tiōh--kuè.

Gōo kang sì mê ê uáh-tāng, thâu-bué khàu-tiāu, tiong-ng sann kang iān Thài-pīng-iūnn huānn-pinn hiòng Tâi-tang kiānn, pah-peh kong-lí tñg ê hái-huānn sann kang kiānn bē thàu, tsit-kuá lōo-tīng iōng tsē tshia--ê. Tang-hái-huānn ê kíng-tì tsám-jiān-á suí, suí kah hiah-nī-á tsiāu-tsñg!

Kiānn ah kiānn, tē-sann kang hong piàn kah tsin thàu, jú kiānn jú tsiāh-lát, tang-sî-á sī miâ hō-tsò Andy ê kiōng-liát hong-thai phah tuì Tâi-tang lâi, liòk-siōng kíng-pò í-king huat-pòo. Tiong-tàu kiānn kàu Tsioh-hōo-suànn, hái-íng phah-tiōh tuā tsioh, tshìng khí-lâi nñg, sann tsàn lâu kuān, khiā tī huānn-pinn, mā ē hōo hái-tsúí phùn--tiōh, put-tsí-á tshì-kik.




03- 彼年熱天的東部名產 (臺羅版課文)

Uī-tiōh an-tsuān, tsú-pān tan-uī kuat-tīng tē-sì kang ê lōo-tīng iōng bāk-tsiu lâi kiānn, tshia tit-tsiap kā guán tsài khì Tāi-tang, thê-tsá tsit kang kái-sàn. Hit-sî, óng Hua-lian ê kheh-ūn, hué-tshia lóng thīng--ah, kan-na óng Ko-hiōng ê Kim-bé-hō, tshun ē-poo sann tiám tsit pang, sì tiám tsit pang, guán hōng hun-phuè tsē sì tiám tsit pang.

Tsóng-sìng tsē tsīunn-tshia, iān-lōo thàu tuā-hong, lōh tuā-hōo, lāk tiám puànn thinn beh àm ê sî, tshia sái kàu Tāi-bú, hiōng-hiōng ùn-tsiàng kā tshia thīng--lōh-lâi. Guá tuì tshia-lāi khuànn--tshut-khì, kong-lōo uá hái tsit pīng ê lōo-ki í-king thap--lōh-khì, liōng-kî-iok tsáp bí tīng, koh kuè--khì, tuì-hiòng ê tshia mā thīng kui pâi. Ùn-tsiàng lóng lōh-khì khuànn, khó-līng teh thô-lūn kám beh mōo-hiám sái--kuè-khì.

Lák tiám gōo-tsáp hun, tsit tsūn tuā-íng phah--khí-lâi, ták-ke kín tsáu-siám, tsit ê tuā-khoo ùn-tsiàng tsáu bē-hù, hōo hái-íng phah--tiōh, tī thôo-kha liàn kuí-nā liàn tsiah peh--khí-lâi, hó-ka-tsài bô hōo ká lōh-khì hái-té. Tsit-siann



03- 彼年熱天的東部名產 (臺羅版課文)

ták tâi tshia lóng kuai-kuai-á sêh huan-thâu, bô tsit-si-á tiû-tû. Àm-sî káu tiám, ùn-tsiàng kā guán tsài tñg-lâi Tân-tang, tiàm tsia bih hong-thai, ke tuà sann m ê.

In-uî tang-pōo bîng-sán —— hong-thai ê in-tuann, gô kang ê uâh-tâng kiu tsò tshun sì kang, koh in-uî kau-thong tñg--khì, suah iân-tñg tsò tshit kang. Thiann-tiôh Hoa-tang thih-lôo thong--ah, guán suî tsông khì Tân-tang tshia-thâu tsé tsá-khí lâk tiám huat ê bân-tshia. He ū-iánn sî bân-tshia, tshin-tshiunn ku teh sô, thuh tshit tiám-tsing tsiah kàu Hua-lian. Hué-tshia kiânn tî Lâi-pênn-poo, iân-lôo khuànn--tiôh ê tiân-hué-thiâu-á lóng tó--khì, king-tsio-tsâng--lah, bôk-kue-tsâng--lah, bô tsit tsâng sî khiâ tit--ê. Tê-it pái kám-siû-tiôh kiông-liát hong-thai ê lát-thâu, guá tsit ê too-tshî-sông, khuànn kah tuâ tshuì khui-khui, tsit kù uê to kóng bê tshut--lâi.


Sui-jiân í-king sî sann-tsáp guâ tang tsîng ê tâi-tsì--ah, tsóng--sî, hit nî juâh-thinn ê tsîng-kíng, kàu-tann iu-guân tshim-tshim tiâu tî sim-kuann-té.

04- 夢中的坪仔田 (臺羅版課文)



Bāng-tiong ê phiānn-á-tshân

Lí Hîng-tik




04- 夢中的坪仔田 (臺羅版踏話頭)

Tse sī tsit phinn ū kóo-tsá-bī kah jīn-tsīng-bī ê
kua-si.


Lán-lâng ê it-sing-tiong tsóng ū tsit-kuá hōo-lâng siàu-liām ê kī-tî. M̄-koh sî-tāi piàn-huà tsin kín, ū ê kī-tî lāi-bīn ê tsīng-kíng, ê bān-bān-á piàn-khuán, sīm-tsì ê siau-sit--khì. Sin-pak-tshī Sam-tsi-khu sī tī-leh Tâi-uân pún-tó ê pak-hái-huānn, tuā-pōo-hūn sī suann-pho-tē, tsū Tshing-tiâu khí khai-khún phiânn-á-tshân, king-kuè nīng-pah-guā nî ê huat-tián, tsîânn-tsò tsin ū kui-bôo ê lōng-giáp bûn-huà kíng-kuan. In-uī phiânn-á-tshân tsìng-tsoh pún-lâi tō khah bô khin-khó, ka-siōng sè-kài king-tsè kah tsū-jîan khuân-kíng ê piän-tōng, hōo tsìng-tsoh ê lâng jú lâi jú tsîo, tsin tsē phiânn-á-tshân tsîū-án-ne pha-hng-khì, sīm-tsì ū ê í-king pang--khì. Huâinn-suann phiânn-á-tshân tī-leh Tuā-khenn-khe tiong-iû, sī Sam-tsi tsin ū-miâ ê phiânn-á-tshân hong-kíng-khu, iáu î-tshî kah tsin hó, nā ū-îng ê-sái khì kiânn-kiânn khuànn-khuànn--leh.

Lí Hîng-tik sian-sinn sī Sin-pak-tshī Sam-tsi-lâng, 1944 nî tshut-sì. Guân-pún sī kong-bū jīn-guân, tsit-má í-king thè-hiu, tsuan-bûn teh kà Bân-lâm-gí kah Bân-lâm-gí siá-tsok. I kà ê Bân-lâm-gí-pan ū "Tâi-tâi i-hák-înn i-iōng Tâi-gí-khò", "Tsîū-tè ôh-tîng sing-uâh Tâi-gí-pan" kah "Bîng-tik Tâi-gí ôh-tîng".



04- 夢中的坪仔田 (臺羅版踏話頭)

Tù-tsok ū 《 Jit-iōng Tāi-gí 900 kù 》, 《 Kán-bīng i-iōng Tāi-gí 》, 《 Hit nî ê juáh-thinn 》 kah 《 Bāng-tiong ê phiânn-á-tshân 》 Bân-lâm-gí suànn-bûn-tsíp. Lán tsit phinn bûn-tsiong tō sī tuì 《 Bāng-tiong ê phiânn-á-tshân 》 suán--ê. In-uī sing-uáh king-giām hong-hù, sóo-í kàu-hák siá-tsok ê tē-tsâi to-quân phong-phài, tsin tát-tit lán tsham-khó.



04- 夢中的坪仔田 (臺羅版課文)

Tsit ê kíng-tì

Sī-án-tsuánn tsáu-lâi guá ê bák-tsiu-tsîng

Hāi guá bák-tsiu m̄-kam nih

Kui ê lâng lóng gōng-sîn--khì

Bák-sái suah kiōng-kiōng-beh liàn--lōh-lâi

Sè-hàn-sî-á tshù-tsîng āu-piah ê kíng-sik

Tsit-tiám-tsit-tiám tī thâu-khak-lâi phû--tshut-lâi

Lák-tsáp kuí tang kuè--khì iáu-koh ē-kì--tit

Tō sī tōo-phînn lâi-té tsit ê bôo-iūnn

He kiò phiânn-á-tshân

Tsit luáh koh tsit luáh thâh kah puànn thinn kuân

Hōo lí khuànn kóng tsoh-sit-lâng ū guā kut-lât

Tshân tsit-khu-tsit-khu teh khui


Kui liáp suann tsuí ē-tàng im kàu tó-uī

Tshân tō khui kah tó-uī

Tshun-thinn ê sî

Liân-tsiau-hue tī tshân-huānn-pinn tiām-tiām-á khui--khí-lâi

Tshí-khak-tsháu kui ê tshân-huānn huat kah muá-muá-sî



04- 夢中的坪仔田 (臺羅版課文)

Muá-suann-âng ka-kī tshuē sóo-tsāi

Tuè lâng khui kah lāu-jiát kún-kún

Hong-kóo-tsiáu-á mā ài tàu-lāu-jiát

Sam-put-sî-á ē tiàm tshân-thâu

Hit phiàn kha-péh-sún-tsâng kha tuā-siann tshiùnn-kua

Pîng-iú hōo guá tsit tiunn siòng-phìnn

Kā guá kóng sī Nî-poh-ní hip--ê

Guá kóng khòng-gī khòng-gī tī lán ê kok-thóo mā ū

Phîng tse khah suí lí ná ē bô khì hip

M̄ sìn guá tshuā lí khì khuànn

Tī guán Sam-tsi Pat-liân-khe-thâu, Înn-suann-á-tíng

Tuā-khenn, Huâinn-suann, Jî-pênn-tíng

Koh píng--kuè-khì ê Ti-tsô-thâm-á-pinn lóng ū

He sī guá ê kòo-hiong


Hōo guá ē lâu bâk-sái ê kòo-hiong!

05- 甜粿的氣味 (臺羅版課文)



Tinn-kué ê khì-bī


Khu Phik-huâ



05- 甜粿的氣味 (臺羅版踏話頭)

"Tsiāh-pá--buē? Tsiāh-pá--buē? "Tse sī thuân-thóng sio-tsioh-mñg ê hong-sik, thiann tiōh tsîann sim-sik. Tsiāh-sit tû-liáu kā lâng kah lâng ê kuan-hē khan--khí-lâi , mā ē-tàng lâu tī kì-tî lāi-té tsîann kú. Tshin-tshiūnn tsok-tsiá kuè-nî tàu tshuân tinn-kué, sui-jiân kuè-tîng tsîann bô-îng, mñ-koh tsò--tshut-lâi ê tinn-kué hó-tsiāh, iáu ū kah a-bú tsò-hué ê huann-hí kì-tî, tse sī iōng tsînn mā bé bē-tiōh--ê.

Pún-bûn sī 107 nî tsuân-kok gí-bûn kîng-sài siā-huē-tsoo lóng-thòk bûn-tsiong kái-siá, tsok-tsiá Khu Phik-huâ sió-tsiá, pit-miâ O-bah, tshut-pán 《 Kué-tsí-gû ioh bî-tshai 》. Tsú-tiunn iōng Lô-má - jî tîng-kin, kiânn hiòng kok-tsè. Sîng-lip kok kip kōo Bân-lâm-gí tsîann-tsò kàu-hák gí-giân ê hák-hâu, thuân-sîng lán pó-kuì ê tsòk-kûn bûn-huà. Kah Lâu Tsîng-guân hâp-siá kuè 《 Khah-ná-khah-ná-hù-tsòk / bîn-tsòk sit-bût 》, 《 Cumacu'ura Kanakanavu Karukarua Khuànn-kìnñ khah-ná-khah-ná-hù-tsòk sit-bût.




05- 甜粿的氣味 (臺羅版課文)

Nî-tau, a-bú nā bé tuā liáp koh suí ê phòng-kam,
guán tō tsai-iánn kin-á-jit beh tshue tinn-kué--ah, ū-kàu
huann-hí. A-bú huan-hù guán tsí-muē-á kā phòng-kam sé
tshing-khì, khàng hōo ta-tsuí, tsiah ē-sái peh lâi tsiah. Phóo-
thong-sî-á, kan-na tsiah ē tiōh gōo kin tsit-pah ê hái-lâi-á-
kam, uá-nî tsiah ē-tàng bé kuì-som-som ê phòng-kam--neh.
Gín-á-lâng m̄-kam tsit tshuì tsiah tsit bān, lóng mā kā tsit
kuéh, tāuh-tāuh-á suh thng, bān-bān-á pōo, khuann-khuann-á
hiáng-siū tsit nî tsit pái ê tsu-bī, tse sī gín-á-lâng ê hó-
khang. Tuā-lâng ài ê sī kam-á-phuê, kōo tshài-to tshiat hōo
iù-iù, tsham lōh-khì kah kué-tshè tsò-hué nuá, án-ne tinn-
kué tō ū kam-á ê phang-khui, thian-jiân koh kiān-khong.

A-bú kóng nuá tinn-kué ê sî, ài kóng hó-uē, mê-nî tsiah
ē sūn-sī. Guán bú-á-kiánn tsóng--sī ná nuá kué ná khai-
káng, a-bú ē tshiùnn i tsa-bóo gín-á sî-tāi ê kua hōo guán
thiann, tsiok sim-sik; ū-sî huann-hí kuè-thâu, uē sa lâi
luān-kóng, suah huān-tiōh kìm-khī.

Kué nuá hó khàng lōh-khì lâng-sîng tshue, guán tsí-




05- 甜粿的氣味 (臺羅版課文)

muē-á hū-tsik tshuān kàu-giāh ê tsháu-in, tshâ-khoo, hōo a-bú hiānn-hué, tō ē-sái tshut-khì sñg--ah. A-bú ē liōng-tsá kau-tài, tiong-tôo bē-sái jip-lâi mñg-tang-mñg-sai, tshiūnn kóng: "Tshue hó--ah--buē?" Án-ne mñg mñ-nā ē íng-hióng mē-nî ê ûn-tôo, kué mā ē tshue bē sîk.

Guá nā phînn-tiôh tsâu-kha tsit tsün tsit tsün ê phang-bî, tō ē tsông beh jip--khì, tuā-siann huah: "Pak-tóo tsiok iau." A-tsí ē suî kā guá khiú-tiâu--teh, koh am guá ê tshuì. A-bú tō tshut-lâi huah guán khì tsò khang-khuè, khuànn sî khì bán ti-tshài, iâh-sî in tsháu-in. Tsit-má siünn--khí-lâi, a-bú tsiânn ū tì-huī, iōng tsit tsiau hōo guá lî tsâu-kha hñg-hñg-hñg, guá tō bô ki-huē jip-khì luān kóng-uē--ah, tsin-tsiânn sî it kiam jî kòo, bong lâ-á kiam sé khòo.

Tú tshue hó ê tinn-kué, sit-tsâi sî tsiok phang, mñ-koh a-bú lóng kóng ài tán líng tsiah ē-sái tsiah, hōo tshuì-sâi ê guá, tán kah tshuì-nuā-ko-á tsháp-tsháp-tih. Ú-sî a-bú bē-kham-tit lâng koo-tsiânn, tō iōng tî thuh tsit sè tè, hōo guá kuè-giàn, koh kóng: "Sio, ài sè-jî--ooh" Ha! Sio, kiann



05- 甜粿的氣味 (臺羅版課文)


tuā tshuì, guá tuā tshuì kā--lōh, uā! Sit-tsāi tsiok hó-tsiāh.
Kué khng keh-kang tō piàn khah ting, puànn-poo-á tshiat
tsit tè tsiah tiám-sim, liáh-iau koh tsí-ki. Nā khah kang-hu,
tō kā tinn-kué tsian hōo tshiah-tshiah, kiâm-tshài iōng iû
tshá hōo phang-phang lâi kauh tinn-kué, hit tsióng tsu-bī,
tsiah--kuè ê lâng tsiah ē tsai.

Tsit-má guá mā tsò a-bú--ah, kuè-nî sî ka-kî tsò ê âng-
tāu tinn-kué, gín-á tsiah kah sút-sút-kiò, guân-lâi m̄-kuán sî-
tāi án-tsuánn piàn, a-bú ê tsu-bī lóng sî siōng tsán--ê.



Tē-sann phinn

Sî-kan ê hô



第三篇 - 時間的河 (臺羅版引言)

Sî-kan tshiūnn tsit tiâu khe-tsuí, ū-sî bān-bān-á lâu, ū- sî tsò-tuā-tsuí, khí tshuah-lâu. Lán ê lik-sú bûn-huà, king-kuè tshing-pah-nî , lóng sî ûn-ûn-á teh thuân-sîng, tak-ke lóng tsin kuàn-sì tsit khuán "bān" ê sing-uâh hong-sik. Tsit kuí nî lâi, tsit tiâu khe piän-tsò lâu tsiok kín, hōo lâng khuànn tiöh sim ê kiann, bô lâng ē-tàng tsai-iánn bîn-á-tsài ê sè-kài, iū-koh ê piän-tsò án-tsuánn? Tî-leh " bān" kah "kín" tsi kan, lán sî m̄ sî ē ū siánn-mih thé-huē--leh?


Tê lâk khò “Tiān-tsú sî-tâi” Tsok-tsiá in-uī ū tsit pái tshut-tiunn, khuànn-tiöh sî-tâi kau-thong ê piän-huà, pún-lâi mā sî tsit ê tì-sik hūn-tsú, m̄-koh bîn-tuì tiān-tsú kho-ki sóo tuâ--lâi ê kái-piän, bô sîng-jîn ka-kî "sông" mā bē-īng--tit. Tiān-tsú kho-ki tuì lán-lâng sing-uâh ê íng-hióng tàu-té ū guā tuâ? Lán koh kè-siök kā khuànn--lôh-khì

Tê tshit khò “Puann-hì--looh” Kua-á-hì sî lán Tai-uân siōng ū tâi-piáu sìng ê hì-tshut. Tsok-tsiá siá-tshut i tuì kua-á-hì ê kám-tsîng kah tsò-hì ê thian-hūn. M̄-koh in-uī hiān-sít ê khó-lî, hōo i hòng-khì tuì tsò-hì ê bāng-sióng. Tî kuè-tîng-tiong mā hōo lán siūnn-tiöh kua-á-hì, sîm-tsì sî thuân-thóng ê bûn-huà, i ê bî-lâi tàu-té tî tó-uî?



Tiān-tsú sī-tāi


Huān Ka-ûn



06- 電子時代 (臺羅版踏話頭)

Tsiānn tsē í-tsīng lán kiò-sī bē huat-sing ê tāi-tsì, tī tsit ê kho-ki tsìn-pōo ê sī-tāi lóng bān-bān-á khai-sí sit-hiān, sīm-tsì kái-piàn lán ê sing-uāh hong-sik. Tshin-tshiūnn bé mih-kiānn bián iōng hiān-kim, ē-tàng iōng sìn-iōng-khah iāh-sī tshiú-ki-á "pi"--tsit-ē tō ē-sái--ah. Í-tsīng lóng ài tshut-mñg bé ê mih-kiānn, tsit-má iōng tshiú-ki-á tiám -tshiħ--tsit-ē, kuè kuí kang mih-kiānn suī sàng kàu tshù. Tsit phinn bûn-tsiong biō-siá tsok-tsiá tī i ê sing-uāh king-giām tiong khuànn--tiōh ê "tiān-tsú sī-tāi" ê hiān-siōng, koh ū hiān-tāi-lâng tī tiān-tsú sī-tāi ê tú--tiōh ê būn-tê. Beh án-tsuánn sik-ìng tsit ê piàn-huà tsiah kín ê tiān-tsú sī-tāi, sī lán hiān-tāi-lâng su-iàu khì su-khó ê būn-tê, mā sī tàk-kang lóng tiōh-ài bīn-tuì ê thiau-tsiàn.

Pún-bûn sī 105 nî tsuân-kok gí-bûn kīng-sài ko-tiong-tsoo lóng-thòk bûn-tsiong, tsok-tsiá Huān Kā-ûn lāu-su, bat tiōh tsuân-kok gí-bûn kīng-sài Bân-lâm-gí jī-im-jī-hîng tsióng-hāng, tam-jīm Thô-hñg-tshī Bân-lâm-gí hú-tō-thuân kàu-su.




06- 電子時代 (臺羅版課文)

Guá tuà tī Thô-hâng, pîng-siông-sî-á lóng sī sái-tshia tshut-mâng. Tsit pái beh khì Tân-pak tshut-tshai, thiann-kóng thîng-tshia-uī tsin pháinn tshuē, thîng-tshia-huì iū-koh kuì-som-som, tsit tiám-tsing tō ài gōo-tsáp khoo, sann kang lóh--lâi beh ná sòng-ē-hô? Siōng-bué iáu-sī kuat-tîng tsē tshia khì Tân-pak.

Sòng-sòng--leh, tsit kuí nî tsē kong-tshia iáh-sī tsē tsiat-ūn ê ki-huē bô tshiau-kuè sann kái, beh tsē tō tsit pang tshia tsiah ê kàu-uī guá mā mā tsai. Bô kā tsē tshia ê lōo-suànn bú hōo tshing-tshóo, guá mā kánn tshut-mâng.

Tsē kheh-ūn kàu tsiat-ūn-tsām, ài koh puânn-tshia tsiah ê kàu-uī. Tuì kheh-ūn lóh-tshia, jip-khì tsiat-ūn-tsām, guá sī khuànn kah bák-tsiu hue-hue-hue, mā-koh ták-ke ê kha-pōo tsin kín. Ták-ke tshiú thêh tsit tiunn 『iu-iû-khah』, pi tsit siann, lâng tō ê-tàng kuè--khì--ah. Kan-na guá tsit ê tsng-kha-sông khiā tī hia, mā tsai beh án-tsuánn kiânn? Hó-ka-tsài, kánn māng tō ū lōo, tú-tiôh tsit uī hū-jîn-lâng, i tsin jiát-sim tshuā guá khì puânn-tshia, guá tsiah ê-tàng sūn-lī



kàu-uī.


Àm-sî tñg kàu tshù--lí, tsiat-ūn ê it-tshè tshut-hiān tī
 guá ê bák-tsiu-tsîng, kám-kak lán Tâi-uân ê kau-thong
 tsîann tsìn-pōo. Bô-lūn sî kong-tshia, tsiat-ūn iah-sî ko-thih
 lóng hōo lâng kám-kak tsin lî-piān, tse sî in-uī "tiān-tsú-
 huà" ê kuan-hē. Tî tsiat-ūn ê muí tsit ê tshia-siunn lóng ū
 pháu-bé-ting, ê hián-sî āu tsit tsām ê tsām miâ, koh ū tsin-
 jîn ê siann-im iōng Huâ-gí, Bân-lâm-gí, Kheh-gí kah Ing-gí
 lâi hòng-sàng , hōo-lí tsai-iánn suà--lòh-khì sî tó tsit tsām.

Tsē tsiat-ūn bô siánn-mih hong-kíng thang-hó khuànn,
 guá tsí-hó khuànn tàk-ke teh tshòng siánn? Siàu-liân--ê teh
 tsò "ànn-thâu-tsòk", thêh tshiú-ki-á lâi khuànn Bîn-tsheh
 kah 『line』. Bô tō sî tsîunn-bâng, khuànn ū siánn-mih
 hó-khang--ê thang bé. Ah nā nî-huè khah ū--ê tō tsē tî
 phok-ài-tsō teh tok-ku. Khuànn tàk-ke lóng teh huê tshiú-
 ki-á, ū iûnn khuànn iûnn, guá mā kā guá ê thêh tshut-lâi
 siu tiān-tsú-phue, kiann ū tiōng-iàu ê tāi-tsì làu-kau--khì.
 M-koh guá sî bē khuànn tshiú-ki-á siunn kú--ê, in-uī án-ne

tuì bák-tsiu tsin siong.

Tsit-má nā beh tshut-mâng bián tsah siunn tsē hiān-kim, in-uī khì tshan-thiann, pah-huè kong-si, tuā-bē-tiûnn iáh-sī kî-thann ê siong-tiàm, iōng "sìn-iōng-khah" tō ē-sái--tit. Pān-kong-sik ê tiān-náu ū ê sī tuā tuā tāi, ū ê sī pōh-li-si. Guán tshù--lí sàu thôo-kha ê ki-khì-lâng, tshia-tíng ê tshuā-lōo-ki-á, hîng-tshia kì-liòk-khì, tī ko-sok kong-lōo ê 『ETC』 lóng sī tiān-tsú sán-phín. Tsit ê "tiān-tsú sî-tāi", tiān-tsú ê sán-phín sit-tsāi sī muá-muá-sī.

Tsit-má tú tsīūnn-tshī ê tiān-tsú sán-phín tsin kín tō ē hōo sin ê huat-bîng uānn-tiāu, tshòng-sin ê kha-pōo it-tít hiòng-tsiân kiânn, in-uī tse sī "tiān-tsú sî-tāi".




07- 搬戲囉 (臺羅版課文)



Puann-hì--looh

Ng Ka-kî




07- 搬戲囉 (臺羅版踏話頭)

Kua-á-hì ū tsíóng-tsióng ê bûn-huà bôo-iūnn,
tuè sî-tâi píng-piàn huan-sin, ū to-guân ê hîng-thài
kah iù-lōo ê ián-tshut.


Kua-á-hì ê suí, suí tī tshiùnn-khiunn sin-tuānn,
suí tī im-gák khik-tiāu, suí tī tsō-hîng hòk-tsong, iû-
kî sî tāi-piáu pún-thóo bûn-huà senn-thuànn. M̄-koh
hiān-tāi-lâng ê gôo-lók sing-uâh tâuh-tâuh-á hōo
bāng-lōo , tiān-sî, tiān-iánn that tînn--ah, kua-á-hì
tû-liáu siā-sîn hîng-guān ê hì-lōo , bô guā-tsē
puann-ián ê ki-huē, bîn-tsiòng tsîam-tsîam tuì kua-á-
hì bô sîk-sâi, iû-koh soo-uán, jit-âu kua-á-hì tsit
tôo huān-sè bô koh sî-kiânn , pún-thóo thuân-thóng
bûn-huà khah m̄-sî ê ka-lâuh--nih? Sít-tsâi tát-tit lán
lái tiōng-sî!

Ng Ka-kî lāu-su tshut-sì tī 1973 nî, Ko-hiông
lâng. Tsit phinn bûn-tsiong jîp-suán kuè Kàu-iók-pōo
ê lóng-thòk suán-bûn, i iā bat jîp-suán Bûn-huà-
pōo pôo-tsôo "Sòo-uī tshut-pán iú-siann-tsu hē-liât
tsuan-àn" tiong ê "Niáu-tshí pān hí-sū", "Niáu-tshí
kā niau tsò-senn-jit", koh ū "Tsháu-tē a-kong ê
tshù" jîp-suán Tsan-bûn-khe kóng-pòo tiān-tâi —
Luân-luân Tsan-bûn-khe Bûn-huà-pōo tsuan-àn. Bôk-
tsiân i tī Tâi-pak-tshî tsîóng-sû tiong-siô-hák Bân-
lâm-gí kàu-hák. I kah-ì Bân-lâm-gí ê iu-ngá kah bí-
lê. Bô-lün im-ūn, liām-iâu, siôk-gí lóng tshiong-buán



07- 搬戲囉 (臺羅版踏話頭)

sian-jîn ê tì-huī, iā sī lán ê bûn-huà tsu-sán. "Ū
bāng siōng suí, hi-bāng siong-suî ", khuànn kua-á-
hì sī i sè-hàn siōng ài tsò ê tāi-tsì, sui-jiân gín-á
sî-tsūn ê bāng-sióng ē hōo hiān-sít thua-buâ, m̄-koh
tui-kiû bāng-sióng m̄ sī siàu-liân-ke ê tsuan-lī , āu--
lái ē-tàng tī hāu-hñg tsīunn-tâi ián-tshut, siàu-liām
tong-nî tsē tī hì-tâi-kha mî-nuā him-sióng kua-á-hì ê
khuài-lòk sî-kong; ñg-bāng koh-khah tsē lâng kah-ì
kua-á-hì, kuan-sim pún-thóo bûn-huà ê senn-thuànn
huat-tián.




07- 搬戲囉 (臺羅版課文)

Ē-kì-tit guá sè-hàn ê sî-tsūn tsîann ài tshiùnn-kua kah puann-hì, iû-kî sī tsîann ài tshiùnn kua-á-hì. Tshiâng-tsāi biō-tiânn nā ū ián kua-á-hì, guá tō kuánn-kín kā í-thâu-á giâ--leh, tsáu-khì hì-tâi-tsîng khuànn hì. Khuànn-liáu tñg-lâi tshù--lí, tō khai-sí tsîau hì-tâi-tíng ián--ê, ka-kî koh puann tsit pái, a-kong, a-má tiânn-tiânn lóng khuànn kah tshiò-hai-hai.

Guá mā put-sî tsîann-tshiú siá kong-khò, tò-tshiú koh teh pí kua-á-hì ê tshiú-sè, tshuì mā tuè leh tshiùnn, sit-tsāi m̄ tsai tau-té ū kā tsheh thák--jíp-khì--bô? Ū tsit pái a-bú ū tsit ê sîk-sāi kua-á-hì-thuân ê pîng-iú lâi tshù--lí, a-bú kún-sñg-tshiò kóng: "Lí khuànn guán tsa-bóo-kiánn ē-sái khì puann-hì--bô?" A-pah kóng: "puann-hì hit tō siunn hòk-tsáp, m̄-thang khì." Ka-tsâi a-pah ū tòng, nā-bô, tsit-má kua-á-hì bô sî-kiânn, guá m̄ tō bô thâu-lōo--ah.


Tán guá tuā-hàn liáu-āu, tâuh-tâuh-á bē-kì-tit ka-kî bat ū hit khuán siünn-beh puann-hì ê bāng, it-tít kàu tsûn--nî tsáp-jí-guéh, guá tî guán tsa-bóo-kiánn ê hák-hāu tsham-ka



07- 搬戲囉 (臺羅版課文)

tsit tshut sìng-tàn-kiòk ê ián-tshut, tō-ián kóng guá ē-sái ián kiòk-pún lāi-té siōng suí ê "ang-á", tiòh-ài tì kim-thâu-mâng, tshīng té-kûn, koh ài thiàu-bú kah puann-hì, tsin-tsiànn sī tsîann tuā ê thiáu-tsiàn. Tú khai-sí kiann-kiann, m̄-koh guá ê hì-hûn ná-tshiūnn khùn-bí-jîn khùn tsit-pah tang liáu-āu, tsing-sîn--ah kāng-khuán, tsiok siūnn-beh tshì-khuànn-mâi--leh. Guá koh siūnn kóng jîn-sing hái-hái, bô guā-tsē ki-huē ē-tàng án-ne tháu-pàng ka-kī, tō suî kuat-tîng beh ka-jip sann kò guéh pâi-hì ê sing-uâh. Tsit sann kò guéh tsîann bô-îng, ták-kang lóng teh kì tái-sû, kha-pōo tshiú-lōo kah bú-pōo, tsiah tsai-iánn ián-uân tsin-tsiànn tsiok sin-khóo--ê! Sui-jiân sin-khóo, m̄-koh khuànn-tiòh hì-tái-kha, gín-á khuànn kah tshiò-hai-hai, guán ták-ke sim-lâi tō tsîann huann-hí.

Kū-nî iáu-koh ū ki-huē khì tsham-ka lîng-guā tsit ê ián-tshut, hit pái guá ián tsit ê tî tsng-kha tsìng-tshân ê tsa-poo-lâng, ài uē tshoo koh oo ê bâk-bâi kah tshuì-tshiu, tōng-tsok mā ài piàn tshoo-lóo. Tse tuì guá tsit ê pîng-




07- 搬戲囉 (臺羅版課文)

siōng-sî iù-siù-iù-siù ê lâng lâi kóng, sî tsiânn tuā ê thiáu-
tsiàn. Ták-ke khuànn-tiōh guá tsng uē hó liáu-āu piän tsit
ê lâng, lóng ná tshiò ná o-ló guá uī gín-á ê hi-sing tsiânn
tuā.

Sui-jiân tàk-ke lóng kóng guán tsia-ê oo-bá-sáng ián-
uân tsiânn ū ài-sim, guān-ì hù-tshut sî-kan lâi pâi-hì. M-
koh tuì guá lâi kóng, tse sî tsit tsióng jîn-sing ê thiáu-
tsiàn, mā sî tsit tsióng hó bôo-iūnn. In-uī guá tî kuè-tîng
tang-tiong, hōo guán kiánn khuànn-tiōh guán tsia-ê a-sáng
khik-hòk khùn-lân kah tut-phuà ka-kî ê tsit bîn. Lîng-guā
koh ū tsit tsióng ì-gî, tō sî guá uân-sîng sè-hàn siūnn-beh
puann-hì ê guān-bōng--ah. Guán a-tsí mā kóng tong-nî bô
hōo lí khì puann kua-á-hì tsiânn bô-tshái, nā-bô tsit-má m̄
tsai tshîng kah tuì tó-uī--khì--ah?



Tē-sì phinn
pó-tó ê kòo-sū




第四篇 - 寶島的故事 (臺羅版引言)

Tâi-uân siōng suí ê hong-kíng tō sī lán ê jīn-tsîng-bī, ū-tsîng ê lâng, tû-liáu kuan-sim "lâng", mā kuan-sim "thóo-tē" kah "sing-thài". "Tsió-tsú-huà" kah "nóo-huà", sī jīn-kháu piàn-huà ê tiōng-iàu gī-tê, khak-pó kah tshiok-tsìn muí tsit ê nî-lîng-tsân kiān-khong sing-uâh kah hok-lî, tsiah ē-tàng hōo lâng an-sim uâh--löh-khì. Tâi-uân hó suann hó tsuí, in-uī king-tsè huat-tián ê kuan-hē, mā sán-sing tsin tuā ê piàn-huà, lán kám thang kā pàng-guā-guā? Khai-huat ê kuè-tîng, mā tsō-sîng sing-thài kái(piàn) kah bùt-tsióng biát-tsuát ê guî-ki, lán bē-tàng bô tiōng-sī. Lâng kah thóo-tē, bān-bùt nā ē-tàng i-tshî pîng-kin huat-tián, tsiah thang hōo lán ê kiánn-sun mā khuànn ē tiöh kah lán kāng-khuán ê kong-kíng.

Tē-peh khò “Khuài-lòk lóng-tiûnn” Í tsit ê too-tshî-lâng ê gán-kong, lâi khuànn tsng-kha a-peh ê tsîng-tsoh, tuì a-peh tsîng-tsoh ê bùt-tsióng kah thāi-tōo, hōo lán su-khó "sit-an" ê būn-tê. Lâng beh tsiah kiān-khong, tō ài tsiau-pōo-lâi, mā-thang siong-hāi lán ê thóo-tē.

Tē-káu khò “A-kong teh tuà-înn” Lâng tsiah ngóo-kok, lân-bián lóng ē sin-khóo-pēnn-thiànn, tsáu pēnn-înn, hōo i-sing khuànn, lóng sī tsîng-siông ê



第四篇 - 寶島的故事 (臺羅版引言)

tāi-tsì. Kuan-sim lán tshù-lāi ê lāu-tuā-lâng, hōo in
ē-tàng an-sim hiáng-siū jîn-sing ê bué tsām. M̄-koh
lán mā ài pō-sioh lán ê sin-thé, m̄-thang siū siong-
hāi. Tuì i-hōo jîn-uân ê hù-tshut, lán koh-khah ài
sim tsûn kám-un, kā in kóng tsit kù "to-siā"!


Tē-tsáp khò “Suann-àm-kng khí-tshù” Tsok-tsiá
tī kong-hñg siông-sè kuan-tshat suann-àm-kong khí-
tshù ê kuè-tîng, lâng kah tsiáu-á bô hōo-siong kan-
jiáu, mā bô in-uī tōng-tsîng tōo-kún, khì íng-hióng-
tiōh ú-tiū ūn-tsuán ê ki-lîng. Ká-sú lâng kah bān-
büt, é-tàng hōo-siong tsun-tiōng, khuân-kíng íng-siök
huat-tián tsiah ū khó-lîng sit-hiān.

08- 快樂農場 (臺羅版課文)



Khuài-lók lōng-tiûnn


Péh Lē-hun



08- 快樂農場 (臺羅版踏話頭)


Tuà too-tshī ê lâng phóo-phiàn khah hán-tit
 tsiap-tshiok thóo-tē kah lōng-tsok-bút. Tsok-tsiá
 kóng i mā sī tsū sè-hàn tī tshī-lāi sing-uáh--ê, in tau
 hū-kīn ū tshài-hñg, nā sà̄n-pōo king-kuè hia, lóng ē
 kah tsìng tshài ê a-peh khai-káng. In ê tuì-uē thîng-
 hiān hñg-á-lāi kué-tsí hâm tshài-se ê sing-tióng, lán
 m-nā ē-tàng him-sióng-tiòh biô-siá sit-bút sing-thài ê
 suí-khuì, koh thang hōo lán uì tuì-uē, siòk-gí óh-tiòh
 tsit-kuá sit-bút ê tì-sik kah kóo-tsá-lâng ê tì-huī.

Péh Lē-hun sió-tsiá sī Sin-tik-kuān Tik-pak-tshī
 kok-tiong-siò pún-thóo-gí kàu-su, tù-tsok to-guân,
 tshut-pán jīn-tsìng tsham-khó-tsheh, koh tam-jīm
 “Sè-kài-bûn-hák Tâi-thòk siàu-liân” siang-gí iú-siann-
 tsu ê Tâi-bûn huan-ik kah kàu-tuì, koh tiòh kuè
 104 nî tsuân-kok gí-bûn kīng-sài Bân-lâm-gí jī-im-jī-
 hñg siā-huē-tsoo tē-it miâ, tsok-phín mā jíp-suán
 tsò kok-sài lóng-thòk ê bûn-tsiong. I kóng pún-thóo
 gí-giân bûn-huà luē-hâm hong-hù koh iu-ngá, kuè-khì
 tsióng-tsióng ê in-tuann tsō-sîng pún-thóo gí-giân



08- 快樂農場 (臺羅版踏話頭)

pháinn miâ-siann kah hōo lâng khuànn-khin. Ng-
bāng tsìng-hú thê-tshut khah iú-siān ê tsìng-tshik lâi
thê-sing pún-thóo-gí-giân ê tē-uī, tak-ke guān-ì hák-
síp kah sú-iōng, gí-giân tsiah ē khui-ki-suànn-hiōh.
Tsit phinn “Khuài-lòk lóng-tiûnn”, jíp-suán 107 nî
tsuân-kok gí-bûn kíng-sài Bân-lâm-gí lóng-thòk siā-
huē-tsoo bûn-pún.




08- 快樂農場 (臺羅版課文)

Ū tsit ê ē-poo guá kiânn-kuè hū-kīn ê tshài-hñg,
khuànn-tiōh tshài-pênn-á-tíng kiat kuí-nā liáp tshiūnn liú-
ting hiah tuā liáp, tshenn-sik tài tiám, m̄ tsai sī kué-tsí
iáh-sī tshài-se? Pún-lâi ioh kám-sī pû-á? M̄-koh kā tsim-
tsiok siòng--tsít-ē, koh bong khuànn-māi, bô sîng--neh!
Tsit-sī tú-hó tsìng tshài ê a-peh kiânn tuì pinn--á kuè, tō
kín kā tshíng-kàu he sī siánn-mih, i kóng: "Sī-kè-kó--ah!
Āu-bīn hia ū tsit liáp í-king huán âng, ē-sái tsiah--ah." I
ná kóng ná kí tuì hit liáp âng-sik ê hia khì, ū-iánn--neh!
Án-ne guá tō khuànn ē tshut--lâi--looh!

"Guá tsū sè-hàn tō tuà tshī-lāi, tsîann tsē lōng-tsok-bút
lóng m̄ bat, khuànn-tiōh tsit ê tshài-hñg-á, guá tsiok hònn-
hiân--ê." "Lí sī too-tshī-sông--lah!" A-peh khai-sí kí pát
tsâng, siāu-kài he sī hué-liōng-kó, he sī king-tsio, he sī
thoo-má-tooh, he sī kim-kue


I kóng king-tsio-tshiū ē tuì pinn--á senn sè-tsâng--ê
tshut--lâi, jî-tshiánn muí tsit tsâng kan-na ē senn tsit king
king-tsio niā, tán tsit king king-tsio kuah--lòh-lâi liáu-āu,



08- 快樂農場 (臺羅版課文)

kui tsâng tshiū-á tō ài tshò-tiāu tsò sè tsâng ê puî-té, guá suî tsiap lóh-khì kóng: "King-tsio thòo kiánn uī kiánn sí." A-peh tàm-thâu. "Ah tsìn-tsîng ū tsit liáp tuì uî-lî ê phāng nìng tshut-lâi lōo-pinn senn tî guā-kháu ê tang-kue, kám-sí lí í-king bán--khí-lâi--ah?" Guá huân-ló hit liáp tang-kue hōo lâng thau bán--khì. "Sí--ah! Pún-tsiânn bô ài tshap hit tsâng tang-kue--ah, bô-gî-ngōo koh senn kuí-nâ liáp tshut--lâi, tian-tò sî hit tsâng lê-bóng, guá tsiânn jîn-tsin teh tsiàu-kòo, tsit nîng kang-á tō kâ ak-tsuí, i suah sí-khiàu-khiàu." "Siök-gí kóng, lâng tshî lâng, tsit ki kut; thinn tshî lâng, puî-tsut-tsut. Huân-sè thian-jiân ê hōo-tsuí kah ióng-hün, i tō lah-sap tsiâh, lah-sap puî-looh!" Guá jú kóng jú ū suà, a-peh tshiò-tshiò-á kóng huan-gîng guá put-sî ka-kî jip-khì tsham-kuan.

A-peh hun-hióng tsiok tsē tsoh-sit ê king-giām, hōo guá tsit ê too-tshî-sông thiann kah hînn-á phak-phak, khuànn kah bâk-tsiu tuā tuā luí, mā kám-siū-tiôh thinn-kong-peh--á thàu-kuè thóo-tê kah lông-tsok-bût lâi kà-sî




08- 快樂農場 (臺羅版課文)

lán: "Tsiáh kué-tsí pài tshiū-thâu, tsiah bí-pīng pài tshān-thâu." Kám-siā tāi-tsū-jiān sù lán sit-büt, lán tsiah ē-tàng sing-tsūn, koh-khah kám-siā pē-bú tshin-tshiūnn king-tsio-tsāng án-ne tsuān-jiān hōng-hiān, kā lán tshiānn-ióng tuā-hàn. Lán mā tiōh-ài iōng kāng-khuán ê sim lāi tshiānn-ióng sī-sè, tse sī sè thuān sè put-piān ê tō-lí.


A-peh tsìng tshài bō tsuānn iōh-á, tì-sú tshài-se hōo thāng tsiah-tsiāh--khì, tō kui-khì kái tsìng khah bē tiōh-thāng ê kué-tsí, mā-nā ū an-tsuān ê kué-tsí thang tsiah, siōng-kài tsán--ê sī, ē-tàng ták-kang lāi tshài-hñg-á phák jit-thâu kiam uāh-tāng kin-kut. Khuànn i tsing-sīn pá-tīnn sin-thé ióng-kiānn, bōk-kuài i ē kóng tsia sī i ê "khuài-lòk lōng-tiūnn"!

09- 阿公咧蹄院 (臺羅版課文)



A-kong teh tuà-īnn

Kueh Sìng-tsòng




09- 阿公咧蹕院 (臺羅版踏話頭)

Tsit khò iōng tuì-uē ê hîng-sik lâi piáu-tát i-liâu ê hiān-tiûnn kah tsōng-hóng, tshái-iōng hóng sió-suat ê bûn-thé tsîann-tsò khò-bûn ê siat-kè lí-liām.


Tsuân-bîn kiān-pó ê tsè-tōo, tñg-tiôh sin-khóo-pênn-thiànn, koh-khah án-tsuánn bân-phuê, ták-ke lóng mā ē khì pênn-înn tshuē i-sing; m̄-koh bîn-tsú siā-huē, ták ê tsîann tuì-tiōng ka-kī ê khuân-ik , tiānn-tiānn ê uī-tiôh uē-gí bē tshing, tsō-sîng i-pênn kuan-hē ê kín-tiunn, sîm-tsì i-liâu ê kiù-hun. Siók-gí kóng: "Sian-sinn iân, tsú-lâng hok." Siang-hong giân-gí nā ē thong, i-pênn kuan-hē tsiah ē hó, kóng hōo tshing, sueh hōo bîng tsiah-sî i-pênn hô-hâi ê kin-pún. Hiān-tsāi ê i-hák, kiông-tiāu jîn-pún, ài tuì pênn-lâng ê kak-tōo tshut-huat lâi khuànn tāi-tsì, lí-kái pênn-lâng ê giân-gí, thong-thàng pênn-lâng ê pún-ì hām sim-tsîng, tsiong i-liâu ê hāu-kó huat-hui kah siōng-hó.

Kueh Sìng-tsong lāu-su tshut-sì tī 1962 nî ,



09- 阿公咧蹄院 (臺羅版踏話頭)

Tâi-tiong-lâng. Bat í "Huê-ka" tiōh kuè Kàu-iòk-thiann té-phinn sió-suat ting-bûn tē-it miâ, hiān-tshú-sî sî ko-tiong kàu-su. Tsit kuí nî lâi tâu-jip Bân-lâm-gí gián-kiù, bat tsí-tō hák-sing tiōh kuè tshit pái tsuân-kok gí-bûn kīng-sài Bân-lâm-gí jī-im jī-hîng tē-it miâ, tik-iu, iā bat tsí-tō hák-sing í "Phōng-suann bîng-hú uē tshong-song—kiàn-tsìng sian-bîn hiat-luī ê kuí-lē sìn-gióng" tiōh-tiōh tē-sann kài "Luā-hô tsuân-kok ko-tiong Tâi-uân jîn-bûn-tsióng" sú-tē-tsoo tē-jī miâ. I tsū sè-hàn kuàn-sì kóng Bân-lâm-gí, í "Ài tsiáp tī sing-uáh tiong tiānn-tiānn kóng, thuā kú tō ē-hiáu kóng Bân-lâm-gí." Tsiânn-tsò i bú-gí kàu-hák ê bòk-piau, ñg-bāng hák-sing ê Bân-lâm-gí ē-tàng tī sing-uáh tiong kóng liáu tsin liàn-tńg.



09- 阿公咧蹕院 (臺羅版課文)


Hōo-lí-su: "Sian-sinn, thâu tsít pái lâi--honn? Sing tshiánn lí siá tsít-ē pēnn-lík."

Thiann-tiōh tsiah liàn-tíng ê Bân-lâm-gí, A-hiông suah sêh-sîn--ah! Kang-tshiúnn sian-puè ê tuì-uē tsîng-kíng phû tsiūnn thâu-khak-lāi.

"A-peh hó, guá sī hōo lí sí(hōo-lí-hē) pit(tshut)-giáp ê hák-sing. Lí teh put-sú-kuí(tuā-sim-khuì) ê sī tō pàng hōo khin-sang, mài siunn kín-tiunn. Guá hōo lí ióng-khì(ióng-khì), sí-sí(suh-suh)--leh khah(khah) khuìnn-uáh." Siông-á-peh ná kóng ná hèinn-thâu.

Pinn--á ê Tshân-á-peh jím-bē-tiâu tō kóng: "Guán lāu--ê khì pēnn-īnn khui-to, hōo-sū kā guá kóng mài siong-sim, tán--tsít-ē lí ē-īng-tit khì kuann-tshâ-sik(kuan-tshat-sik) khì khuànn--i--ah. Kóng kah li-li-lo-lo, guá thiann lóng bô! Tshin-tshiúnn ah-á thiann luî, koh hāi guá kiann kah hiám-hiám kiânn--khì. "

Hōo-lí-su: "Ueh! Sian-sinn, lí ū án-tsuánn—bô?"




09- 阿公咧蹄院 (臺羅版課文)

Hōo-lí-su: "Tse kuí ki? Lí kám ē thâu-khak thiànn, beh
thòo beh thòo, kui-sin-khu bô-lát, lán-lán ài-
khùn, bô sîn?" Hōo-lí-su tshun-tshut tsit ki
tshiú-tsíng-thâu-á mñg kóng.

A-hiông: "Tsit ki tsíng-thâu-á. Guá bô kám-kak án-tsuánn!"

Thâu-khí-sing tshù-pinn khà tiān-uē hōo i, kóng a-kong
hūn--khì, tsit-má sàng-khì pēnn-īnn. Tsū sè-hàn tō sī a-
kong tshiânn-ióng tuā-hàn, sī i i-uá ê tshin-lâng. Thiann-
tiōh sàng-khì kip-kiù, i tsianh khuà-sim a-kong bē-hiáu kā
i-sing kóng tsìng-thâu. I tō ki-tshia khiâ--leh, iû-mñg tshui
tsin-pōng, tsit lián sì-tsáp, hiong-hiong-kóng-kóng tō hiòng
pēnn-īnn khiâ--khì, bô-gî-ngōo tī uat-kak ê lōo-bīn ū tshui-
tsioh-á, suah tshū--tó pha-liàn-táu! Āu--lái kiù-hōo-tshia lái-
-ah, i pài-thok in kā i sàng-lái kah a-kong kāng king ê
pēnn-īnn.

Hōo-lí-su: "Ueh! Sian-sinn, lí tsit-má kám-kak án-tsuánn?
Guá kiann lí khiâ-tshia tshū--tó, thâu-khak kháp--



09- 阿公咧蹕院 (臺羅版課文)


tiōh. Tshiánn i-sing kā lí kuan-tshat tsín-tuàn ū
náu-tsìn-tōng--bô?"

A-hiōng: "Guá bô tāi-tsì. Kiù-hōo-tshia lâi ê sî, guá lâng
tsiok tshing-tshénn, kan-na kha-tshiú tshè-phuà
phuê niā-niā, thâu-khak-tíng ê an-tsuân-bō koh hó-
hó."

Hōo-lí-su: "Siàu-liân-lâng khiâ-tshia m̄-thang khiâ hiah
hiōng. Kiù-hōo jîn-uân kóng kui tâi tshia mi-
mi-mauh-mauh, lâng it-tīng tsîann siong-tiōng.
Iáu-sî hōo i-sing kiám-tsa khuànn-māi--leh.
Lîng-guā tsîàu kui-tīng, tshia-hō ài thiу hueh
giām khuànn ū lim tsîú--bô?"

Keh-piah tshîng: "Hōo-lí-su, Guán lâu-pē kui-sin-khu phih-
phih-tshuah, pài-thok lí lâi khuànn-māi!"
Keh-piah tshîng ê ka-siòk lâi tshiánn hōo-lí-
su tàu-sann-kāng.

A-hiōng tsiah tì-kak tsit ê hōo-lí-su kah pát ê hōo-lí-
su ê tsè-hòk bô kāng-khuán, jî-tshiánn sî tsit ê tsa-poo.



09- 阿公咧蹄院 (臺羅版課文)

Hōo-lí-su: "Bô iàu-kín! Hîn-tsiam niā-niā, khah tsù-ì--tsit-ē
tō hó."

I koh tñg-lâi A-hiông ê pênn-tshñg-pinn, liâm-mi huan-
hù tsit ê hōo-lí-su thè A-hiông niû hueh-ap kah thiu hueh.


A-hiông bô-gî-ngōo i sî tsit ê tsa-poo ê hōo-lí jîn-uân,
tō khui-tshuì kā i mñg.

Hōo-lí-su: "Tsit-má sî sìng-piât pîng-tíng ê siā-huē, tsa-poo
mā è-sái tsò hōo-lí jîn-uân, ná-tshiünn tsa-bóo
sian-sinn mā tsin tsé!"

A-hiông: "Ooh! Guán a-kong kiò-tsò Tân Hué, mâ-huân lí
kā guá tàu tshâ--tsit-ē. Guá tō sî beh kuánn lâi
khuànn i tsiah è khiâ hiah-nî-á kín." A-hiông
khuànn i tsîânn û nâi-sim kah tíng-tsin, sim-
kuann-té ê giâu-gî lóng bô--ah!

Hōo-lí-su: "Lán sing hōo i-sing tsín-tshat, tán--tsit-ē, guá è
kā lí tàu tshâ lín a-kong ê tsîng-hîng."

King-kuè kip-tsín-sik i-su ê tsín-tshat, khang-tshuì buah



09- 阿公咧蹕院 (臺羅版課文)

iōh-á tshú-lí, hōo-lí-su tñg-lâi A-hiông ê pēnn-tshñg-pinn.

Hōo-lí-su: "Tân Hué a-kong tsit-má tī ka-hōo pēnn-pâng.

Tán lí tuā-tâng tih suah, khì hing-khám-kho
mñg-tsín tshuē Tēnn i-su liáu-kái."

Tēnn i-su tshím-thâu sing siông-sè mñg a-kong ê sing-
uáh sip-kuàn kah tsit kuí nî ê i-liâu-tsōng-hóng.


I-sing: "Tân Hué sian-sinn bòk-tsiân hì-pōo kah náu-pōo ū
kuānn-tsuí. Hip tiān-kong liáu-āu, hì-pōo ū tshiam-
uî-huà ê hiān-siōng, guán huâi-gî ū senn pháinn-
mih-á. Iáu-koh su-iàu hip kē-tsè-liōng hián-iánn tiān-
kong lâi khak-tîng."

A-hiông: "Guá pîng-siông hán-tit thiann i kóng khuì tshuán
bē kuè--lâi, sī mī sī pok-hun ê kuan-hē?"

I-sing: "I pok-hun guā-kú?"

A-hiông: "Tsha-put-to ū gōo-tsáp tang!"

I-sing: "Sàng-lâi pēnn-înn tsìn-tsîng, kám ū siánn-mih bô
sóng-khuài, iáh-sī pát-hâng ê sin-khóo-pênn-thiànn,



09- 阿公咧蹄院 (臺羅版課文)

iáh-sī bān-sìng-pēnn?"

A-hiōng: "I ū ko-hueh-ap, mā ū khì tsín-sóo théh iōh-á.
M-koh mā ē thau-thau-á bé piān-iōh-á, lūn-tsin lâi
kóng, guá mā kánn khak-tīng."


I-sing: "Guá ē tsiàu i ê tsōng-hóng tsò tsit-kuá kiám-tsa."

A-hiōng: "Kám mā sī ū tsít tsíóng nòng pōng-khang, iáh-sī
tiān-náu tīng-tsân ê gî-khì, tsin kín tō kiám-tsa ē
tshut tsìng-thâu."

I-sing: "I-liâu ê thîng-sū ē tsiàu tsuan-giáp ê tsín-tshat tsò
kiám-tsa, mā ū kui-tīng. Lí hòng-sim, pēnn-înn ē kā
pēnn-huān tsiàu-kòo hó-sè."

A-hiōng: "I-sing, guán a-kong pài-thok--lí! Hōo lí ke tsin
tsē mâ-huân, lóo-lát--ooh!"

King-kuè siông-sè ê kiám-tsa kah tī-liâu, a-kong tsing-
sîn--ah! Pēnn-in kîng-jiân sī ím-sít bô-sè-jī, koh oo-péh
luān bé piān-iōh-á lâi tsiâh, tsō-sîng sin-tîn-tâi-siā ê bûn-tê
kah tiān-kái-tsít sit-tiâu. I-su iau-kiû A-hiōng khì tshuē




09- 阿公咧蹄院 (臺羅版課文)

pēnn-īnn ê uē-sing tsu-sūn hōk-bū, liáu-kái pēnn-lāng tsiàu-kòo, ím-sít kah tsiáh iōh tiōh-ài sè-jī ê mê-kak. Hit sî-tsūn, A-hiōng sim-kuann-thâu pák ân-ân ê khan-kuà kánn-ná sió-khuá pàng-līng tsít-kuá-á--ah.



Suann-àm-kong khí-tshù


Lâu Tsīng-kuan



10- 山暗光起曆 (臺羅版踏話頭)


『黑冠麻鷺』Bân-lâm-gí hō-tsò "suann-àm-kong", sin-khu senn-tsò tsin sîng han-tsî-hîng, sóo-í mā ū-lâng kóng sī "han-tsî-tsiáu"; koh in-uī tú-tiôh lâng bē kiann-hiânn, lóng bân-bân-á kiânn , mā ū-lâng kóng sī tshin-tshiūnn m̄ tsai guî-hiám ê "tuā-gōng-tsiáu". Suann-àm-kong khiā--khí-lâi, tsha-put-to ū 47 kong-hun kuân, pún-lâi sī tuà tī lâi-suann, jî-tshiânn kan-na tī àm-sî tsiah ê tshut-lâi thó-tsiâh uâh-tâng. Tsuè-kîn tsit kuí nî , khó-lîng sī in-uī pô-iòk kuan-liām tsìn-pōo, khah bē khì siong-hâi tsiáu-á, sóo-í tī kong-hñg, hâu-hñg-lâi tiānn-tiānn ê-tàng khuànn-tiôh suann-àm-kong, Lâu Tsîng-kuan sió-tsiá tsiong i tī kong-hñg khuànn-tiôh suann-àm-kong uâh-tâng ê tsîng-hóng, siá tsò tsit phinn bûn-tsiong hōo lán him-sióng.


Lâu Tsîng-kuan sió-tsiá sī Tsiang-huà-kuān Uân-lím-lâng, bat tam-jîm “Tâi-uân sin-sing-pò” hù-khan tsú-pian, gōo, lák-tsáp nî lâi lóng sī iōng Huâ-gí-bûn teh siá-tsok, mā bat tit-tiôh kok-ka bûn-gé-tsióng. Tsit kuí nî lâi ê kái siá Bân-lâm-gí-bûn, tsú-iàu sī siū-tiôh hâu-senn Tsiu Îng-sîng ê íng-hióng, in hâu-senn bat tī Kong-kiōng tiān-sî-tâi tsú-tshî "Sè-kài-tâi" tsiat-bók, tiānn kā i kóng Bân-lâm-gí koh sann-tsáp nî tō ê bô--khì. I siūnn-kóng "guá ê bú-gí tō sī Bân-lâm-gí ah, sui-jiân guá 80 huè--ah, m̄-koh mā



10- 山暗光起曆 (臺羅版踏話頭)

siūnn-beh uī Bân-lâm-gí tsīn tsit hūn sim-lîk. "Lán
tsit phinn "Suann-àm-kong khí-tshù", tō sī tuì Lâu
Tsīng-kuan sió-tsiá "Kiann-kiann bē tiōh-tíng" tsit
pún Bân-lâm-gí suànn-bûn-tskeh suán--ê.






10- 山暗光起曆 (臺羅版課文)

Kin-á-jít tī kong-hâng, khuànn-tiōh tsit tsiah suann-àm-kong pue tsīunn tshiū-á-tíng, tām-pōh-á ì-guā.

Ták piàn khuànn-tiōh in, lóng sī tī tsháu-poo-á-tíng tsáu-tsông. Sin-khu tuā ê tsíau, khiā tiām-tiām ê sī, gōng-sīn-gōng-sīn, khuànn tiōh tsin tshù-bī, ū-sī khó-lîng sī huat-hiān thâu-tsîng ū làh-büt, kiânn tsiok kín, thâu-khak-tíng hit tshok oo-sik ê moo suah piàn-tsò tsit ki tsiam-tsiam ê māu, kánn-ná sī tsit ê beh hām tik-jîn kuat-tàu ê bú-sū. Ū-sī khuànn-tiōh i kā tñg-tñg ê tōo-kún-á tuì tsháu-poo-á khiú--tshut-lâi, tō thè i huann-hí, "Òa, ū tsit tñg hó-liāu--ê--lah."(Sui-jiân hū-jîn tsi jîn, iā ê khó-liân tōo-kún-á.)

Pîng-sî khuànn ê tiōh ê tsíau-á, it-puann lóng "lâi iā tshong-tshong, khì iā tshong-tshong", kan-na hún-tsíau hām suann-àm-kong m̄ kiann lâng, suî-tsāi lí him-sióng i ê sik-tshái hām tōng-tsok. Hún-tsíau tsin tsē, lóng tsit tuā tīn lâi, bô hi-hán, khah hán-tit khuànn--tiōh--ê sī suann-àm-kong, in kuànn-sì tan-tòk hîng-tōng, muí tsit ê tōng-tsok tshin-tshiūnn kè-sñg--kuè, bān, iu-ngá. Khuànn kah tsin sik-




10- 山暗光起曆 (臺羅版課文)

sāi--ah, kìng-jiān kàu kin-á-jít, tsiah tsai-iánn tsit-tsióng tuā tsiah, kuàn-sì tī tsháu-poo-á-tíng hîng-tōng, khuànn--khí-lâi gōng-gōng ê tsíau ē pue.

Eh? Kì-sìng tsin bái, kū-nî kong-hîng hit thâu tsit tsâng tshîng-á-tshiū-tíng m̄ sī ū tsit ê suann-àm-kong ka-tsòk? Nā bē-hiáu pue, beh án-tsuánn tī tshiū-tíng tsò siū!

Tsit-má tsit tsiah pue tsíunn tshiū-á-tíng ê suann-àm-kong tō sī teh khí-tshù tsō siū. I tī pak-phuê-tshiū-á-tíng, thîng tsit-sî-á, tshui-lâi kā tsit phinn sè sè phinn ê hiôh-á, tsiah pue khì pinn--á hit tsâng ka-tang-tshiū. Hia í-king ū tsit ê uánn-kong tuā ê siū ê tshoo-phue--ah. I m̄ sī pue-lâi-pue-khì phah-piànn tsoh-sit, i tī nñg tsâng tshiū-á-tíng lóng ē hiôh tsit-tak-kú-á, tsiah tsìn-hîng suà--löh-khì ê tōng-tsok. Guá ioh i tsiah-nī kín-sín, tsit hong-bîn sī tsim-tsiok suán kiàn-tsâi, tsit hong-bîn sī kiann lâu-siáp ka-kî ê hîng-tsong, hōo pháinn-lâng khuànn-tiôh i ê pì-bit. Tuì tsíau-á lâi kóng, tsò siū, tshî kiánn, lóng sī ài khuànn sì-hng, sió-sim hong tiáp ê tāi-tsì. Guán tau tshù-tíng bat ū pêh-thâu-khok-



10- 山暗光起曆 (臺羅版課文)

á lâi tsò-kuè siū, in ê sim-lí guá ke-kiám ū liáu-kái--ah!

